

سرى للغاية

اجتماعات مجلس الرئاسة
القاهرة - قصر القبة فى ٢٨ نوفمبر ١٩٦٢
الاجتماع الحادى عشر

الحاضرون

الرئيس جمال عبد الناصر، عبد اللطيف البغدادى، عبد
الحكيم عامر، زكريا محى الدين، حسين الشافعى، كمال
الدين حسين.. نواب رئيس الجمهورية، أنور السادات،
حسن ابراهيم، على صبرى.. رئيس المجلس التنفيذى،
نور الدين طراف، أحمد عبده الشرباصى، كمال الدين
رفعت.

المحتويات

الصفحة	الموضوع
١	١- ملخص خطاب كنىدى الى عبد الناصر عن اليمن، وعرض أوضاع القوات المصرية هناك
٥	٢- التسويق الداخلى لمحصول القطن
١٧	٣- وضع الحجوزات فى جمارك الموانى
٢٨	٤- موقف الحكومة السعودية من الرعايا المصريين هناك وأملآكهم
٣٠ - ٣١	٥- مناقشة اعادة تقييم الضريبة على الأطنان

سرى للغاية

قرارات مجلس الرئاسة

فى ١٩٦٢/١١/٢٨

اطلاع المجلس على الرسالة التى بعث بها الرئيس كنىدى الى الرئيس جمال عبد الناصر بخصوص الموقف فى اليمن.

كما اطلع المجلس على أرقام المتابعة لأهداف خطة التنمية فيما يختص بالصناعة وبالحواصلات الزراعية. وأصدر المجلس بعض التوجيهات فى هذا الشأن للمجلس التنفيذى لمناقشتها حتى يمكن تحقيق أهداف الخطة وتجاوز الأرقام النهائية لها، خاصة وأن بعض الحاصلات الزراعية قد حققت بالفعل أرقاما أعلى من الأهداف.

كما اطلع المجلس على مشكلة الموانى وأسباب تعطل تفريغ البضائع، وقرر المجلس تأليف ادارات منفصلة للموانى ومجالس ادارات موحدة لها. وسيعد المجلس التنفيذى مشروع قرار لتحقيق هذا الغرض.

كما وافق مجلس الرئاسة على القرارات المرفوعة اليه من المجلس التنفيذى.

سرى للغاية

اجتماعات مجلس الرئاسة

القاهرة - قصر القبة في ٢٨ نوفمبر ١٩٦٢

الاجتماع الحادى عشر

عبد الناصر: بالنسبة للموضوع بتاع خطاب كنيدي: ملخص كلامهم هم عايزين يخلصوا الموضوع حتى لا تتطور

الأمر فى المنطقة، يعنى هم عايزين الحقيقة العملية لا تتطور الى عملية زى حرب اليمن فى داخل السعودية بيحصل صدام بينا وبينهم اذا حصل، ومتصورين أيضا إن استمرار هذا الموقف حيحصل له reaction أكبر فى السعودية.. الكلام اللي قالوه.

وبعدين بيقلولوا هنا: حتى نبنى على انهاء المساعدات وانسحاب السعوديين والأردنيين بعد الكلام ده. هو قابل على صبرى وحصل كلام وهم قالوا: إن الأردنيين حيمشوا يروحوا الأردن والسعوديين حيمشوا الى نجران، وإحنا كنا طلبنا موضوع البدر ثم طلبنا موضوع بيحان.

وبعدين إحنا قلنا لهم: عايزين نتفق على توقيتات مش نيجى إحنا نعمل بيان.. والسلال قال: لازم السعودية واليمن يعملوا بيان، إحنا وجدنا مفيش داعى إن السعودية والأردن يعملوا بيان وجدنا مفيش داعى لهذا لأن هو بيانه اللي بيضمن يعنى لو هم يطلعوا بيان يطمنوننا، يعنى اللي طالع بيان بيضمن بيبقى متهيألى بيكون هو الأقوى فى الحرب.

وبعدين إحنا قلنا: لازم نتفق على التوقيتات، هم حيطلعوا بيان يعنى بعد بيانا بـ١٢ ساعة. قبل كده إحنا عملنا بيان وحصل كلام بين على وبين السفير الأمريكى عليه، بيان طويل كان فيه كلام عن الاستعمار وعلى كذا وكذا، هو قال: إن بيانهم حيشير الى بيانا ومعنى هذا إنهم بيأيدوا كل كلمة فى هذا البيان؛ فبنقدر نطلع بيانين البيان الأولانى وبيان تانى نخلى يشيروا الى البيان الأولانى فى موضوع فى البيان التانى.

واتعمل بيان اللي هو "تعلن الجمهورية العربية المتحدة تأييدها وتأكيدا لكل ما جاء فى البيان الذى أصدرته الجمهورية العربية اليمنية، وأن الجمهورية العربية المتحدة لتشعر بالفخر ازاء ما قامت به تجاه ثورة اليمن وموقفها للدفاع عنها تلبية لرغبات الشعب اليمنى الذى تعرض لتهديدات شتى.

ولقد استطاعت الجمهورية العربية اليمنية اليوم تثبت أقدامها بحزم وأصبحت هى الحكومة الشرعية القائمة فى اليمن.

إن الجمهورية العربية المتحدة اذ تبدى كراهيتها لاستمرار سفك الدماء لتعبر فى الوقت نفسه عن استعدادها لوقف الاشتباك المسلح من جانبها، وأن تبدأ فى سحب قواتها الموجودة فى اليمن بالتدريج اذا ما انسحبت القوات السعودية والأردنية المشتركة فى تأييد الملك المخلوع من مناطق

سرى للغاية

الحدود، وإذا ما توقفت المساعدات الخارجية للملكيين أو حالما تطلب منها ذلك حكومة الجمهورية العربية اليمنية.

وسوف تكون الجمهورية العربية المتحدة عند وعدّها إذا ما سارت الأمور على ذلك".
الانسحاب طبعاً بشروط وإحنا اللي حنقدر ايه الشروط.

البيان التانى بيشرح العملية وايه الهدف، يعنى كان المفروض النهارده يقابل على معرفش..

صبرى: النص طبعاً هو بيقول: "إذا ما انسحبت القوات السعودية الأردنية المشتركة من تأييد الملك المخلوع من مناطق الحدود وإذا ما توقفت المساعدات السعودية والأردنية والخارجية".

عبد الناصر: آه.. ده حسب كلام كنىدى.

صبرى: أيوه.. السعودية.

عبد الناصر: السعودية.

صبرى: إذا ما توقفت المساعدات السعودية والأردنية والخارجية.

عبد الناصر: والخارجية.

صبرى: للملكيين.

عبد الناصر: للملكيين يعنى هو ده النص بتاع كنىدى.

صبرى: وأنا قابلته النهارده الصبح وهو قرأه وقال لى يعنى مبدئياً: إن هو حبيعتة لواشنطن النهارده ويمكن يقول رده بكره الضهر، ولكن مبدئياً أنا مش شايف أى صعوبة فى هذا البيان.

سرى للغاية

عبد الناصر: هم بقى مصممين المشكلة مع اليمن هم عايزين يتقال فى بيان اليمن عدن والمحميات، يعنى يقولوا: ملهمش حاجة بالنسبة لعدن والمحميات؛ ده طبعا يخلص على حكومة السلال ده الكلام، وبعدين ده كمان مش جه فى توقيته يعنى هو حقنا نبعت للسلال الكلام ده.. فهم الحقيقة بدهم نتيجة قطعاً..

صبرى: انتصارهم.

عبد الناصر: بدهم يغيروا الحال، إحنا بنقول للسلال نبعت البرقية.

صبرى: أيوه.

عبد الناصر: ده الوضع الحقيقة بالنسبة لليمن، وبرضه اعتراف الصين والغرب بيخلى العملية الثانية أسهل القبائل. وإحنا عندنا معارك دلوقتى فى الشمال، الحقيقة بالذات فى صعدة كان والله الموقف امبارح كان موقف وحش بالنسبة لينا.

فيه قوة كبيرة طالعة بتوصل بكره ومعاهم القوة اللى طالعة معاها، ده بالنسبة للعملية. بالنسبة للبدر، البدر موجود شمال صعدة بين صعدة وبين السعودية حوالى ٢٠ كيلومتر؛ قوات البدر موجودة فى شمال صعدة والبدر موجود جوه السعودية فى الجبال. وإحنا كان كلامنا مع الأمريكان على أساس الأمريكان لازم يتعهدوا هم، قلنا لهم: مش عايزين طرف ثالث مش عايزين الأمم المتحدة لأن أنا فى رأى الأمم المتحدة فى صالح المعتدى بيقوموا بمساندة عملية يعنى رابطة بين الأمم المتحدة لصالح المعتدى فيجبوا مراقبين. فإحنا لم نوافق على ده ولا على ده قلنا لهم: تتعهدوا كده يعنى بينا وبينكوا يبقى تقولوا لصحابكوا إن يحصل انسحاب من نجران وجيزان، وهم تعهدوا أيضاً قالوا: الأردنيين حيمشوا.

وقلنا لهم: البدر موجود فى السعودية على حدود اليمن يابياخدوه فى حرض يابيدخلوه فى حاجة غير كده بيبقى يقعد على الحدود بيبقى زى ما هو، يعنى هو حيثير المشاكل ياخدوه من هناك يابيسيويه من غير حراسة. وإحنا سياستنا لحد دلوقتى مانجيش ناحية السعودية.

المنطقة الثانية: اللى هى منطقة فى الجنوب الشرقى عند مآرب القوات بتاعتنا هناك، القبائل اللى هناك اللى هم قبائل العبوش اللى كانوا عاملين العمليات دى، وجه السلال كان عايز يذبهم!

سرى للغاية

فيه هناك جنوب قبائل طالعة على مأرب، وصلت لمنطقة ما بين مأرب وما بين صعدة دول فيهم قبائل.

يبقى فاضل المحور الثالث اللي هو شمال ما بين مأرب وما بين صعدة اللي هو صرواح. فيه برضه الضرب بالطيران ضربوا، تعتبر العملية يعنى على أول الشهر. يجى بعد كده الانسحاب، طبعا السلال مش موافق على الانسحاب أبدا، هو متصور طبعا يعنى مفيش ولا حاجة مش حتكون غير قواتنا فى مأرب، عندنا دلوقتى قوات ٣ ألوية مشاة ولوائين صاعقة وعندنا قوة دبابات.

وبنجهز دلوقتى قوات جديدة صاعقة؛ بحيث يبقى الصاعقة مع الطائرات مع شوية هليوكبتر، وبعدين حنديهم كل الطائرات اللي هى حتى محناش محتاجين لها.. طائرات اليك ماعدا اليوشن ودول حوالى ٢٤ طائرة.

ولكن يعتبر برضه العملية الغرض بتاعها اللي هو نجاح الثورة فى اليمن.. تحقق الغرض بتاعها.

أى استفسارات؟

أيوه.

رفعت: بالنسبة لفیصل وتحقیق غرضه.

عبد الناصر: هو كلام الأمريكان فى هذا إن فیصل اتورط فى العمليات، والحقیقة إحنا اتكلمنا مع الأمريكان بالنيابة عن سعود وحسين! (ضحك)

صبرى: السلال والبيان.

عبد الناصر: البيان حنتقق عليه إحنا مع الأمريكان أو السلال مع الأمريكان حيشيروا الى هذا البيان وإنهم موافقين عليه، وده اللي حىخليهم يعترفوا فلما يجى يقول تقرير المصير طبعا مش حيمكن الانجليز يقبلوا بهذا.

سرى للغاية

رفعت: ممكن يتقال: إنهم يطالبوا بالوحدة مع الجنوب.

عبد الناصر: بيطالبوا فى الجنوب بالوحدة.. آه.

رفعت: والانجليز بيقولوا لأ.

عبد الناصر: آه.

رفعت: بعد كده فيه كلام متهيألى للحكومة اليمنية مالكومش دعوة.

عبد الناصر: لأ.. هذا لا يمنع ما هو بعد ما يطلع هذا البيان اللى حتسير عليه أمريكا فى نفس اليوم يقدروا يقولوا البيان تانى.
أيوه.

صبرى: هو دلوقتى بالنسبة للتسويق الداخلى المحصول سواء من داخل..

عبد الناصر: ده ايه الارتباط؟

صبرى: لأ.. السوق الداخلى المحالج، يعنى القطن الزهر ده كان أعلى نسبة من أى سنة تانية. بالنسبة للارتباطات بنفكر إن احنا نطلع بالسعر، بما إن وصلنا دلوقتى لنفس السعر بتاع السودانى فممكن إن احنا نطلع شوية عن السودانى. كان مجموع ارتباطات دلوقتى ١٧٣ ألف بالة بالنسبة..

البغدادي: هو السودانى كان فيه مشكلة.

الشرباصى: هو الفلاحين كان عندهم مشكلة يعنى حتى وسائل النقل نفسها، وبعدين النهارده المحالج كسبوا حاجة سريعة بدل ما يصرف للراجل خمسة ريال حق الوزن بقى تلاته ريال.

سرى للغاية

صبرى: ما هو الحقيقة كان خطتنا فى الأسبوعين اللى فاتوا، إن احنا ناخذ السوق لأسبوعين رغم إن السودانى حصل سعر كويس. اللى فاضل للتصدير، هو إحنا صدرنا ٢ مليون قنطار واشترطنا على ٢,١٢٥ مليون بالة، الهدف ٦ مليون.

هم حاطين هدف على أساس إن ندى للمصانع تخزين كامل، أنا رأيى إن احنا لازم نغير العملية دى لأن دلوقتى السوق مبقاش زى زمان كان زمان، كل واحد بياخذ بنفسه دلوقتى كله بقى فى المؤسسة؛ مفيش داعى إن أنا أحافظ على كمية كبيرة فى حين إن أنا ادبته من أول الموسم يشتري على طول يايما فى المؤسسة يايما فى لجنة القطن ويقدر أوزع على طول.

البغدادى: أد ايه؟

صبرى: ٢,١٢٥ مليون بالة.

لغاية دلوقتى باين إن احنا مش حنقدر نحقق أهداف التصدير، هو بالنسبة للميزانية النقدية المفروض إن احنا كنا نصدر فواكه بـ ٥ مليون جنيه شايفين إنه مش هيتحقق؛ السبب فى هذا مش كعجز فى البرتقال ولكن الخطة كانت التعاقد لـ ٣ أشهر وبالتالي الـ ٣ أشهر الأخرنين بتوع الموسم، وبالتالي الحصيلة بتاعته مش حتدى إلا بعد التلات أشهر.

بالنسبة لأهداف التصدير المنظورة يحصل عجز فى القطن حوالى ١٩,٢ مليون.

البغدادى: قطعاً لازم ٣ أشهر يبقى عملية..

صبرى: إذا كنا صدرنا التلات أشهر الباقين، السنة اللى فاتت كان فيه قطن يعنى صدرناه مكانش العجز ده ظهر..

حسين: من ضمن الميزانية النقدية حالياً.

صبرى: فدلوقتى إحنا ابتدينا فى اشتراطات الارتباطات من ناحية الشحن.

عبد الناصر: أه.

سرى للغاية

صبرى: يعنى متجيش المهلة بتاعة ٣ أشهر وماشية العملية دلوقتى. لو قدرنا نكمل بالشكل ده يمكن نقدر نستعوض العجز بتاع حصيلة القطن.

بالنسبة للسلع الزراعية الأخرى، كان المقدر حصيلة الصادرات ٤٥ مليون جنيه إن الهدف المنتظر ٤٧ مليون زائد ٢,٥ مليون.

البغدادى: العلاوة.

عبد الناصر: ٥٠ يعنى أد ايه ٥٠ مليون جنيه؟

صبرى: أفندم.. صادرات القطن ٤٥ مليون اللى حيتحقق ٤٧,٨، الصادرات الأخرى حنعدى بشكل بس هيبقى غالبا فى قطاع الزراعة بالكامل على إن القطن العجز الكامل ١٦,٧ مليون.

محي الدين: بتاع المستقبل؟

عبد الناصر: يعنى الصادرات المنظورة فى قطاع الزراعة ١٢٠ مليون جنيه.

البغدادى: المفروض إنها..

عبد الناصر: لأ.. ٨٠ و ٤٠.

صبرى: الواقع حيبقى ١٢٨ مليون جنيه لغاية النهارده.

بالنسبة لقطاع الصناعة كنا حاطين أهداف فى قطاع الصناعة.

عبد الناصر: يعنى إحنا بناخد قمح من أمريكا بحوالى ٣ مليون جنيه أو أكثر تقريبا.

صبرى: بالنسبة لأهداف الصناعة، كان الهدف بتاعنا مقارب ٨٠,٧ مليون جنيه خلال السنة والمنتظر تحقيقه ٧٢,٥ مليون والعجز ٩ مليون جنيه. العجز أساسا برضه دى مشكلة أمريكا بتاعت خط غزل المنسوجات، وكنا مقدرين الهدف بتاعنا ٣٦ مليون جنيه نتيجة تخفيض الصادرات من الغزل والمنسوجات لأمريكا، ولكن فيه محاولات دلوقتى لرفع الكوتة بتاعتنا مع أمريكا ونستعوض هذا.

سرى للغاية

طبعا هو فيه سوق تانى اتقفل بالنسبة للمنسوجات اللي هو السعودية، لكن مهواش كبير لكن أساسا نحاول طبعا فى أسواق تانية.

عبد الناصر: لازم السعودية مش حتاخذ..

صبرى: هو بيحصل دلوقتى نتيجة.. لكن هو يعنى التصدير لسوريا متوقفش.

عبد الناصر: لأ.. يعنى قصدى يبقى فى..

صبرى: اللبنانيين بيصدروا لسوريا.

عبد الناصر: بيصدروا لسوريا، ولأ السعودية؟

صبرى: لأ.. لسوريا حتى التصدير ماشى لسوريا ٢٤ قيراط عن طريق لبنان.

عبد الناصر: طيب ما نعمل ده نفس..

صبرى: نفس العملية دى يعنى للسعوديين، انما هو العجز الأساسى فى الحقيقة..

عبد الناصر: أظن مستعدين الأمريكان.

صبرى: آه.. ممكن نتكلم معاهم دلوقتى على رفع الكوتة؛ لأنهم حددوا الكوتة على ضوء السنة اللي فاتت والسنة اللي فاتت كانت أسوأ سنة.

وبعدين فيه طريقة تانية: إن احنا نغير، هو فيه بعض الأصناف اللي محدد لها كوتة بنقدر نتوسع فى الأصناف التانية اللي مش متحدد لها كوتة، ونوجه الأصناف اللي هم محددين لها كوتة. طبعا المحاولات مستمرة لكن الصورة النهارده إن فيه احتمال عجز ٩ مليون فى الصناعة، منهم ٤,٥ مليون بالنسبة للغزل والمنسوجات والباقى غالبا فى البترول. برضه واجدين مشكلة فى تصدير البترول بالنسبة للمنافسة.

سرى للغاية

عبد الناصر: يعنى تكلم عزيز .

صبرى: وأنا اتكلمت مع عزيز برضه.

عبد الناصر: السكر .

صبرى: وطاقة التكرير حتى دلوقتى بقت كانت بالنسبة للتوسع إن احنا بنكسب فى عملية التكرير يعنى نجيبه خام ونكرره، هنا بنكسب فى العملية ٩ جنيه فى الطن لو استوردنا سكر من رومانيا أو بلاد زى كده وصدرنا السكر بتاعنا لدول عملة حرة.

عبد الناصر: عشان أد ايه نكمل العملية دى، فيه نقطة لازم برضه نخليها فى المتابعة اللى هى تصنيع الحاجات اللى نعتد فيها على التصنيع أو الزراعة؛ فمثلا كان بيقى فيه مشروع وبعدين كانوا وافقوا على ٣ سنين، وهذا معناه لما تيجى قطعة أعمل لها sample وبعدين الحقيقة أى سنة فانت معناها إن الـ ٣ بقوا ٤! معنى هذا إن عملية الراديوهات مثلا وعملية التليفزيون، حاجات كتيرة جدا يعنى سلع المفروض سهل قوى نعملها فى السنة الأولى كذا السنة الثانية كذا. الحقيقة ده لازم نوصل له فى عملية التصنيع يعنى العمليات دى هى الأساس؛ قصدى مثلا عمليات السلع الوسيطة وعمليات تصنيع السلع الوسيطة وتصنيع الحاجات اللى بنعمل لها..

صبرى: الاستهلاك بيزيد بشكل واضح.

عبد الناصر: ما هو طبعا إحنا فى سنة ٥٣/٥٢ أول ميزانية اشتغلنا فيها مع عبد الجليل العمرى كانت ١٩٤ مليون جنيه، ميزانية السنة دى ١٠١٢! طبعا ناس كتير بتشتغل وناس كتير بتزيد..

سرى للغاية

البغدادى: هو معدل الاستهلاك المستهدف يزيد على معدل الانتاج.

عبد الناصر: هو فيه فى العملية النهارده حاجات الحقيقة لازم تتعدل لازم تبحتوا؛ يعنى أنا بدل ما أمشى وأدفع فى الاستهلاك..

صبرى: النهارده بتحصل ٢٠٠ ألف راكب جديد يوميا مسافر الى القاهرة.

الشافعى: ما هو كان السنة اللي فاتت العدد اللي مسافر الى القاهرة حوالى ٧٠٠ ألف!

عبد الناصر: المشكلة مثلا حتبص تلاقى بنستهلك محصول القطن كله، مش حنقدر نصدر اذا مازودناش فهى عملية الاستهلاك والأسعار يعنى لما..

البغدادى: والله يافندم ده من تأثير اللي خدناه، يعنى خفضوا الأسعار ويرفعوا الأجور وبعدين يترتب على هذا زيادة الاستهلاك. فبرضه لازم نفكر نثبت الأجور.

عبد الناصر: يعنى إحنا رفعنا الأجور الأدنى.

صبرى: ما هى الأجور استهلكت لرفع أسعار.. إحنا رفعنا السنة دى أسعار..

سرى للغاية

البغدادى: والبنزين.

صبرى: والبنزين يعنى فيه استعوضوا فى الحقيقة كل اللى متوزع كأرباح للعمال.

عبد الناصر: لكن فيه ناس راحوا يشتروا من محلات ملاقوش حاجة ورجعوا!

طراف: بس ده كان علشان التخفيض اللى كان حاصل.

عبد الناصر: لازم نشغل الحقيقة.

صبرى: والله لو تتعكس الصورة دى لو كانت السلع الوسيطة أو التجميع هو ينعكس، يعنى النهارده مثلا مشكلة المواصلات.

البغدادى: قطع الغيار.

صبرى: على طول إن احنا نزود الأوتوبيسات معناها إن أنا بزود استيراد العربيات.

عبد الناصر: طيب أنا كلمت وزير الصناعة وقال: إن الآلات المطلوب إنها تجيبها علشان تجدد بيها المصانع مخدناش بيها، فنتج عن هذا إن اتعطل الانتاج فنتج عن هذا إنى أجيب أوتوبيسات.

صبرى: ... نفس الشئ اللى أنا بقوله يعنى رغم الانتاج فيه production بيضطر يستورد، يعنى الطلب عليه ضعف المقدر ٥٠ ألف جهاز فى السنة ولأ ١٠٠ ألف كمان.

عبد الناصر: آه.. لكن إحنا اللى بنكسب.

صبرى: هو التليفزيون بالنقد الأجنبى غطى نفسه وزيادة، الحقيقة لو كلهم يمشوا بالشكل ده كان ربحونا من ناحية..

سرى للغاية

البغدادي: النقطة الرئيسية اللي بيشير ليها الريس قطعاً خاصة بالسلع الوسيطة، الريس يعنى تفكيره لها أولوية حتى بالنسبة للصناعات الثانية.

عبد الناصر: هتصدر موالح؟

صبرى: آه.

عبد الناصر: السنة دي عندنا انتاج أكثر من السنة اللي فاتت.

حسين: وبعدين السنة دي فيه انتاج كويس، لكن حصلت مشكلة بين التصدير ووزارة الزراعة. الرز ده قليل قوى لو كنا زرعنا فى ابريل، واحنا قلنا: طب هل ده أكثر من ٧٥٠ لكن مش أقل من ؛ هم جاييين ٢,٦ ضريبة فى الفدان.. إحنا زرنا كام فدان يأخ شرباصى؟

صبرى: ٨٣٠.

حسين: لو حسبنا ٨٣٠ وحسبنا الاستهلاك ٨٠٠؛ متهيألى إن فيه تقصير هنا فى العملية.

البغدادي: بالنسبة للطماطم هو المحصول نفسه السنة دي.

حسين: ٣٥ ألف لشراء البذور، وأنا متهيألى لو اتعملت مجموعات من الفدادين للطماطم، حنسيب فدان فى كل مزرعة يشرف عليها ناس من الجامعة؛ يعنى العملية تبقى لأ.. عملية ثانية خالص للبذور فقط خاصة للتصدير.

عبد الناصر: ايه اللي حصل فى التصدير؟

حسين: الزراعة كانت مسؤولة عن الزراعة والجمعية التعاونية وهيئة التجارة الخارجية قره كان مسؤول عن التصدير، كان قال: يتفق إن هو يجيب العبوات ويبستلم من الغيط، يعنى كانت المهمة بتاعت الناس إنهم يزرعوا وينقوا ويقطعوا ويجيبهم ناس يستلموا من الغيط.

سرى للغاية

عبد الناصر: يبقى أنا لو تذكروا مرة قلت بالنسبة للتصدير: المنتج هو اللي يفكر.. فاكرين العملية دي حصل فيها مناقشة.

البغدادى: كان مستحيل إن يحصل المنتج يصدر فى الظروف فى الجو بتاع السنة اللي فاتت.

عبد الناصر: السبب ما أنا عارف ده، ليه هو بدليل المنتج بتاع الفيوم صدر مع الهولنديين؛ طيب ليه نخلي حاجة فى البلد تتصدر دلوقتى؟

حسين: مكانش متيسر للمطبوعات دي كلها دي موجودة فى كذا محافظة، وبعدين اتقال: إن احنا مرتبطين ومستعدين نرتبط، وقالوا: إحنا مستعدين نزرعه بس يجيبوا العبوات ويستلم. وبعدين محصول الطماطم من عندنا مزروعة كويس وانتاجها كويس لازم حصل حاجة فى السكة لابد! إن أصلها دي عايزه متابعة ومتهيألى المتابعة مكانتش كفاية.

الشرياصى: هم أمس الهولنديين كانوا موجودين فى الفيوم. ولكن النقطة الثانية إن الجو السنة دي كان وحش زى ما بيقول الأخ عبد اللطيف أغسطس وسبتمبر؛ فحرارة الجو السنة دي كانت على غير العادة؛ يآفة يامن الجو كانت الشجرة لما تيجى تطرح يسقط الطرح بتاعها على هذا الأساس يمكن يكون فيه زهرة، أو اللي يكون اللي عند فلاحين السنة دي بيجمعوه للسوق المحلية أثرت أيضا.

حسين: لأ.. ده فيه برنامج مخصوص مجموعات من الأرض ومشرفين.

الشرياصى: دا فى كل حنة السنة دي الفدان ماجبش حاجة العروة دي كلها راحت.

سرى للغاية

صبرى: هو حشاد لما قال لى الموضوع: إن هو عنده ارتباطات ممكن يرتبط وأنا قلت له يرتبط، والأسبوع ده ابتدى يتفق هو رأسا.

عبد الناصر: لأن إحنا فى الحقيقة لازم نصدر وبزود التصدير.

صبرى: بالنسبة لمحصول الرز بقى عندى تقدير لأن احنا لا الرز ولا الذرة حنقلهم عشان المعونة متناثرش، والمساحة المنزرعة كلها ٨٣٠ ألف فدان حسب التقديرات السابقة وعمل عليها ششنى. المزرع رز صيفى ٨٢٣ ألف فدان منهم فى الأصل محصول الفدان ٢,٦١ ضريبة مجموع الانتاج ٢,١٥١ مليون ضريبة، يقابله لحد السنة اللى فاتت متوسط الفدان ٢,٢٨ يعنى ١,٢ مليون ضريبة.

عبد الناصر: ٢ مليون؟

صبرى: ٢,١٥١ مليون السنة دى كان ١,٢٠٠ مليون.

عبد الناصر: السنة اللى فاتت كام؟

الشرباصى: ١,٤٠٠ مليون طن.

صبرى: وبعدين إحنا اتناقشنا فى التصدير ويعنى على ضوء الكلام بتاع السنة اللى فاتت، إنه كان محصول ٧٨٥ ألف السنة اللى فاتت حصل shortage فى أزمة الرز لحد فى الشهر الأخرانى فى الموسم، هو لو كنا بنعتبر ٧٨٥ ألف طن ده هو الاستهلاك المحلى فعلا متهيألى مش حنقدر نصدر كمية السنة الماضية.

الشافعى: كام؟

صوت: ٧٨٥ ألف، وحصل shortage يعنى لازم نستقطعهم من التصدير.

سرى للغاية

الشرياصى: بس إحنا صدرنا السنة اللي فانت.

صبرى: صدرنا ٢٨ ألف طن.

حسين: متهيألى يوم ما كان اللي بيضربوا الرز مش عايزين يبقوا يتعبوا نفسيهم ويعملوا ١٠٠ ألف طن وقالوا: إنهم يعملوا ٧٥ ألف طن بدل ١٠٠ ألف. يعنى هو صحيح بتوع وزارة الاقتصاد ممكن إنهم يبقوا شوية فى أرقامهم يعنى ساعات، برضه بتوع اللي بيضربوا الرز.. يعنى السنة دى أكثر من السنة اللي فانت.

صبرى: مليون تقريبا مليون ضريبة و ٦٦٦ ألف طن أو ٧٠٠ ألف طن السنة اللي فانت.

حسين: إحنا صدرنا شوية رز.

صبرى: متهيألى ٧٥٠ كفاية لو حاولنا برضه.

عبد الناصر: هو قايل لنا المطلوب طالع صح.

حسين: لأ.. أنا كنت بحسب ٦٥٠.

البغدادى: أولاً هم بيحسبوا الاستهلاك يعنى مش حساب أكيد، لو تمسك إنت الـ ٣ سنين السابقة والسنة دى حتجد فيه ٦٥٠ ألف، وبعدين سنة تانية كنا شفناها ٨٠٠ ألف طن زاد الاستهلاك بكمية ضخمة جداً.. مش ممكن الاستهلاك يكون زاد كده.

عبد الناصر: يعنى ارتبطنا على ٦٥٠ ألف طن؟

الشافعى: آه.. وممكن أرتبط بأكثر من كده.

سرى للغاية

الشرياصى: بس فيه نقطة دلوقتى المضارب ما هى كمية الرز اللي اتوردت للمضارب؟

صبرى: ٧٠٠ ألف.

الشرياصى: ٧٠٠ ألف ضريبة يعنى أقل من ٥٠٠ ألف طن.

صبرى: فيه برضه مشكلة النقل لحد كبير لأنه موسم القطن والرز فى نفس الوقت.

الشرياصى: يعنى مثلا لو كان الإحصاء يستمر كل أسبوع أو كل شهر.

حسين: هو إحنا الأزمة بتاعة السنة اللي فاتت فى الرز اللي كانت حصلت فى آخر السنة، كانت سوق توزيعها أزمة حقيقية عشان لغاية آخر السنة.

البغدادى: إحنا قلنا السنة دى قبل نهاية الموسم بخمس شهور.

صبرى: انما بنقدر بنمشى على ٦٥٠ ألف لغاية ما نشوف الموقف على ضوء الصورة.

حسين: لا.. هى ١٠٠ ألف، متهألى ١٠٠ ألف يبقى معقول قوى.

صبرى: وأنا سألت قلت لهم: هل لو مرتبطناش فى الـ أشهر الجايين دول السعر هيتأثر؟ قالوا: لأ.. يعنى السنة اللي فاتت مثلا الارتباطات فى آخر الموسم أحسن من الأول؛ فممكن نستنى خصوصا إنه مفيش خوف على الرز الحقيقة من ناحية السعر.

حسين: لأ.. اللي أنا بقصد بيه المضارب، نهار ما نيجى تبطل النهارده متعملش الهدف وبنيجى نصدر مناقيش المضارب عملت الكمية المناسبة.

البغدادى: يعنى المضارب بتعمل ١٠٠ ألف؟

سرى للغاية

حسين: آه.. معلى بنأمل بنضرب المحصول وبعدين نبقى نثبت على كده.

البغدادى: الشحنة السنة الجاية المينا مش مستعدة ولا المراكب إنها تشحن ١٠٠ ألف طن.

حسين: مشكلة شحن.

صبرى: فى المينا فى اسكندرية اتناقشنا فى المشكلة دى وفيه حاجات مرمية فى المينا، العملية حتى انتشرت فى الجرايد والمشكلة لها معنى أسباب كتير جدا..

أول سبب إن سلطة المينا موزعة يعنى مفيش شركة موحدة.

النقطة الثانية: النهارده أصبح الاستيراد كله مؤمم مفيش خوف الحقيقة إن واحد بيستورد حاجة إلا احتمالات بسيطة جدا اللي بيستورد حاجة غير مصرح؛ يعنى اذا صناعة فى الآخر الاستيراد بتاعه للصناعة، اذا كان قطاع خدمات بياخد للخدمات، اذا كان زراعة بياخد.

فيه ساعات مبقولش مفيش أخطاء قطعاً بيحصل أخطاء، إنه بيستسهلوا بيحببوا حاجات عشان هنا المنتج محليا وعشان نواقص فى السوق زى مثلا حديد التسليح أو شئ من هذا القبيل. لكن مهما كانت الأخطاء متبررش المينا يفضل مرمى فيها ١٥ مليون جنيه حاجات ومكدسة، وداخل علينا موسم استيراد القمح كميات ضخمة جدا، وفيه حاجات كتيرة جدا معرضه للتلآف.. فيه حاجات خسرت من مبيدات حشرية.

فالحقيقة أنا رأيت فى هذا إنه الجمارك النهارده منتشغلش إلا عملية تحصيل، ملوش دعوة يشوف اذا كان مطابق للمواصفات ولآ مش مطابق للمواصفات؛ وخصوصا إن احنا بنتوسع فى استيراد حاجات أصبحت كلها فنية.. يعنى قطع آلات فنية جدا لا يمكن لرجل جمرك إنه يقدر يحكم. وفى الغالب العملية كلها تتعطل نتيجة إنه بيعت يسأل وزارة الصناعة، ووزارة الصناعة بيعت مندوب يشوف المينا اذا كانت مطابقة لإذن الاستيراد ولآ مش مطابقة، والعملية كلها ملخبطة!

ومثل آخر اللي هو عامل مشكلة كبيرة، مثلا النهارده اللي هو الخشب ضمن المينا.. مكدسة خشب ليه؟ لأنه ضمن القرارات بتاعت وزارة الاقتصاد إنه الخشب عند استيراده يستورد تلت أحجام كبيرة وتلت أحجام متوسطة وتلت أحجام صغيرة؛ فالشركة اللي بتتعاقد مبتجيش تلت وتلت وتلت بتتعاقد تلت كبير وبعدين نص السنة بتتعاقد على تلت تانى وفى الربع الأخير من السنة يكمن بتتعاقد على التلت الأخير، وبتشون فى مواسم معينة اللي بيكون فيها الخشب بره أرخص ليهم فبيجى يقف فى المينا يلاقى كله أحجام كبيرة، الجمرك يوقفه يقول له: لآ.. إنت ليك التلت بس أحجام كبيرة واستتى لما حد يجى من وزارة الاقتصاد.

سرى للغاية

عبد الناصر: فلوس مبعثرة يعنى.

صبرى: وكلها فلوس خسارة، والحقيقة يعنى أنا شايف إنه موضوع الجمارك من ناحية..

عبد الناصر: وبعدين هي الجمارك عايزة وزارة، يعنى إنت دخلت كل بلاد العالم عاملين وزارة زى مرفق هيئة اللاذقية.

صبرى: بالضبط.

عبد الناصر: كنا اتكلمنا برضه السنة اللي فاتت.

صبرى: هو فيه مشروع طبعا.

عبد الناصر: للمطار وللا..

صبرى: أصل فيه خناقة رهيبه تبع مين بقى لغاية دلوقتى؟ وأنا رأيى إنه يبقى تبع وزارة المواصلات للأسباب اللي حقولها برضه كحل بدون مشاكل كبيرة.

بالنسبة للمينا بقى كحجمها ضاقت جدا، ومعدل الزيادة الشهرى ١,٧ يعنى معدل كبير جدا فى الزيادة فى الصادر والوارد.

عبد الناصر: حيزيد.

صبرى: وحيزيد، حصلت المناقشة فى المجلس التنفيذى، واضح إن الحجم من ناحية الأرصفة مهواش مشكل كبير عندنا ٥٥ رصيف المستخدم فى أى يوم ٣٥ وعندنا احتياطى.

سرى للغاية

عبد الناصر: المناطق.

صبرى: انما هى المنطقة بتاعة التخزين نفسها بتاعت المينا هى اللى فيها عجز كبير، ودلوقتى مطلوب يدرسوا التوسع لتوصل حتى لغاية الشارع والشوادر بتاعت الخشب توصل لغاية شارع المكس.

البغدادى: الوردىان..

صبرى: الوردىان؛ لأن ده الحل الوحيد وإلا حنضطر نعمل مينا جديدة وهى مش داخله فى الخطة الخمسية دى هى وحتتكف الحديد.

عبد الناصر: حنعمل مينا جديدة وبعدين حياخدوا وقت طبعاً.

صبرى: وكذلك يعنى حندرس احتمالات توزيع، يعنى مش كله نقعد فى اسكندرية بنشوف السويس وبورسعيد وكل الصادرات والواردات من الشرق الأقصى تبقى فى الأدبية والسويس بدل ما كلها فى اسكندرية، ولو إن دى احتمالات ضعيفة قوى لأن الأدبية فيها space وغير مستغلة بالكامل. بعدين اتضح إنه فيه المؤسسات والوزارات معندهاش امكانية إنها تسحب بسرعة، فنقوم تخزن ويسحب يوم ما هو عايز.. فيه اهمال!

وبعدين وسائل النقل، فيه نقطة بيدوروا على وسائل النقل، يعنى تعاقدا مع بتوع لوارى فى اسكندرية وهى بتفضل إنها تشتغل بره المينا لأن المينا الطرق بتاعتها وحشه قوى يعنى بتهلك اللورى؛ بيفضل لو عنده شغل بره يروح ينقل بره أحسن من ما ينقل فى المينا.

وبعدين لقينا إن فيه تجربتين ناجحين قوى التجربة بتاعت وزارة التموين والتجربة بتاعت السد العالى، هم دول الجهتين اللى مافيهمش أى تكديس فى المينا وكذلك بنك التسليف ليه؟ عملوا عقد مفتوح مع وزارة المواصلات عليه، فيه لجنة مشتركة من واحد من المواصلات وواحد من الجهة اللى تعاقدا عليها معاها وواحد من الجمارك، المواصلات هى اللى بتخلص بتتنقل وتوصل للحنة اللى هى فيها، وييرتب نفسه سواء من قطورات أو من النقل النهري أو من..

عبد الناصر: هو أكسل من الأولانى لكن أنبه! (ضحك)

سرى للغاية

أصوات: (ضحك)

صبرى: ما هو ربح نفسه حيعمل ايه؟ (ضحك)

أصوات: (ضحك)

صبرى: الحقيقة بالنسبة للمؤسسات الللى فيها عمليات زى هيئة السنوات الخمس والمؤسسات دى، أنا فى رأى إن احنا بنعمم التعاقد ده وتبقى وزارة المواصلات هى الللى متعاقدة فى المينا للنقل فى الداخل، وأصبحت وزارة المواصلات النهارده هى الللى بتتنقل من الخارج لأن النقل..

عبد الناصر: مستعجلة الللى بالقطر أو بالنهر أو..

صبرى: بيرتب نفسه ويعمل ال plan بتاعه على هذا الأساس؛ بينقل هو من الخارج للداخل يعنى فى البحر بواسطة النقل البحرى وبعدين بينقل فى الداخل أو هو مسؤوليته ينقل الحلقة المفقودة هى المينا، لذلك أنا بقتراح إنه المينا تبقى تبع وزارة المواصلات.

البغدادى: هو عملية التكديس برضه زى ما الأخ على ذكر المشاكل، فكنا قلنا: حتى الجمارك تبقى كل مؤسسة أو كل شركة لها مندوب فى الجمارك يبقى موجود للشركة نفسها فى الموقع؛ بحيث أى بضائع على طول يسحبها فتنقل الى الموقع، وبعدين تفتح الصناديق هناك ويشوف ويراجع وبيدفع مبلغ تأمين. الحاجة الثانية: برضه نفس الناس اشتكت، وبعدين الخلاف الموجود بين مصلحة الموانئ والجمرك.. مصلحة الموانئ تكلم مصلحة الجمارك عايز مخازن أو عايز أرصفة، يقول له: مافيش! ويقوموا واقعين فى بعض، برضه خفر السواحل والمشكلة يعنى زيادة.

عبد الناصر: آه.

سرى للغاية

البغدادى: كنت برضه حاولت أتفاهم مع الحربية عشان أمشى العملية مأمكانش. الأرصفة عايزه تتوسع مفيش أماكن غير على الشوادر بتاعت الخشب دى المكان الوحيد، اذا كان السلاح البحرى لو يدونا الحتة دى.

هو لو بس الأجهزة الحكومية - زى ما الريس اقترح قبل كده - مدير شركة اتأخر فى سحب الآلات بتاعتهم يبقى بيدفع غرامة أو بيدفع أرضية؛ ده لو ينفذ كل واحد حيسحبه على طول بدل ماهيروح يدفع أرضية جديدة.

وكمان القطاع الخاص بيعمل نفس العملية، بدل ما يأجر أرض ويودى الحاجات يشونها فيها فيبسبها فى الجمرك يعتبروه أرخص وفيه حماية وحراسة.

عبد الناصر: طب ما نزود الأرض دى.

البغدادى: هو عيب..

صبرى: لا.. تعديل اللوائح نفسها.

عبد الناصر: لأ.. يدفع أرضية وبضيفها على..

البغدادى: هو أصل اللايحه متهيالى سنتين يقدر يسيبها، ده إحنا عدلنا ده وعلمنا القانون فده لو أسرعنا فيه.

عبد الناصر: ما عملتش ليه؟

البغدادى: كان قانون المعاشات محجمهم، فلو القانون بيقول له يمشى مع عملية المؤسسات تنتظم على أساس النقل فى السنة الجاية.

سرى للغاية

صبرى: هو طبعا الغرامة..

البغدادى: هناك أرضية تعود عن مثلا عشر أيام تأخير يعنى مثلا..

صبرى: هو متهيألى زيادة الغرامات برضه حيرفع السعر..

البغدادى: هو مش مهتم قاعد فى مكتبه.

صبرى: بس هو الحل عملى التعاقد مع جهة النقل، وببيدى غرامات للأشخاص يعنى مدير الشركة.

عبد الناصر: السفر.. كلهم سافروا مفيش واحد قاعد، عملوا جدول زمنى واحد سافر فى مايو والتانى سافر فى ابريل والتالت سافر فى يونيو، كلهم واخين بدل سفر!

صبرى: هو التوحيد، برضه المينا ده موضوع مهم جدا بس يتبع مين؟

عبد الناصر: يعنى فى مارسيلىا حددوا ٧٪ وفى نيوپورك ٧٪.

حسين: اللاذقية كان فيه..

عبد الناصر: لا.. اللاذقية ٧٪.

البغدادى: يعنى أصلا مايمكينش تتبع المواصلات لأنها هيئة..

سرى للغاية

عبد الناصر: مستقلة.

البغدادى: لأ.. ده بيحصل موارد من موارد الدولة ودى مسؤولية وزارة الخزانة، جهاز بيحصل موارد ويصدرها
يعنى العملية عملية التحصيل..

عبد الناصر: دى تابعة لمين؟

البغدادى: فيه مجلس ادارة وكله، لكن فيه موظفين الجمارك بتحصلها.

صبرى: هو لازم مندوب الجمارك مندوب السواحل مندوب..

عبد الناصر: بس واحد يعنى بيبقى..

صبرى: بس بيبقى تبع وزارة ما.

عبد الناصر: إيه اللي حاصل فى المينا؟ فيه مدير الجمارك وفيه مدير السواحل وفيه المخازن، وفي العمليات دى
كلها يجب أن يكون فيه واحد بيبقى فيه local administration و general administration.
الـ local administration اللي هناك اللي هو قائد المنطقة بيدى أوامره بس ميقدرش يغير
التعريفة الجمركية، التانى اللي هو الـ general administration اللي هو بيقرر التعريفة الجمركية
لكن بيقول ده وده يتعمل زى زمان فى عمليات الجيش و local administration و general
administration. هو الجيش حل المشكلة دى بإيه؟ يعمل local قائد المنطقة هو اللي ليه الكلمة
الأولى والأخيرة، بس ميقدرش يقول غيروا تدريب المدفعية من كذا مدة أو لو يعنى لو على الطيران
وكله فبيبقى قائد منطقة، قائد المنطقة مسؤول عن الكل.

سرى للغاية

حسين: هو كان فيه مشروع درس فى المحافظين ووزارة الخزانة لهذا الموضوع، وكان فيه بيبقى الشخص المسئول ده تبع المحافظ، لكن كلهم يبقوا بيتبعوا برضه وزارة من الوزارات زى وزارة الخزانة أو وزارة الاقتصاد..

عبد الناصر: عبد المجيد بيقول لى ميناء نيويورك تبع محافظ نيويورك مطار نيويورك.. المحافظ ميقدرش يغير التعريف الجمركية أى واحد اللي هو تبعه اللي بيرأس بيدير..

صبرى: .administration

عبد الناصر: بيبقى administration، هو قطعاً محافظ اسكندرية ما يقدر يعمل حاجة طبعاً.

حسين: لا.. لأ.. هو بيعترض النهارده عشان المسح والكنس والانارة والمياه بتعطل الناس، وفيه مشاكل بين المحافظة وبين الناس دول والجمرك يقولوا لأ دى تبعنا والمحافظة تقول مش تبعنا! تبقى يعنى عملية مشاكل.

عبد الناصر: طيب فيه مانع الـ authority ببقى تابع للمحافظ وبعدين النقل بيبقى تبع المواصلات الجمارك تبع الاقتصاد من ناحية ايه الـ general؟

صبرى: الناحية الفنية.

عبد الناصر: الناحية الفنية.

البغدادي: والأرصفة.

عبد الناصر: والأرصفة تبع الموائى، بس الـ authority هى اللي تقول نهد الرصيف أو منهدوش مش تيجى الموائى تهد مثلاً، وكذلك بورسعيد هى بورسعيد تبع القناة أظن.

صبرى: تبع القناة.

سرى للغاية

البغدادى: هو أصل فيه ٤ ضباط داخلين خفر السواحل ومصلحة الموانئ ربما يستعينوا..

صبرى: لازم حد من الزراعة.

عبد الناصر: وبعدين المطارات برضه عايزة. ده كان فيه واحد هنا جابه اتفقوا معاه على أساس هيعمل دعاية وهيجيب سواح، مسكوه فى المطار وهو طالع بهدلوه فقال: ما نقدر! بعد ما وقع العقد. وبعدين حتى فيه جمرك فى السلوم أى واحد من المغرب والجزاير وتونس وليبيا بيجوا، فى النهاية بيمشى الدنيا دى كلها يمكن لغاية ما بيجوا.. فيه واحد جه هنا بالعربية بيقول لى: بيوقفوه ١٦ ساعة!

ابراهيم: لا.. الحقيقة كمان هو معذور.

عبد الناصر: ليه بقى!؟

ابراهيم: يعنى هو بيشتغل ٢٤ ساعة وبعدين فى أى وقت يروحوا يصحوه!

عبد الناصر: فهى كل دى عمليات، يعنى السلوم ومطار القاهرة عايز برضه والمينا فى اسكندرية عايزه ومينا السويس عايزه، هم بيبقوا تبع لمين؟ معرفش!

صوت: المحافظين.

عبد الناصر: تبع مين يعنى؟

ابراهيم: ما دول تبع المحافظين.

سرى للغاية

حسين: هو ممكن وزارة تعمل تنسيق عام، لكن لو خدوا اعلانات كل يوم ما تتحلش مشكلة إلا من الوزارة وحيقف الحال برضه زى ما واقف النهارده! فيعنى يبقى فيه authority تبع المحافظ راجل كبير يبقى على طول..

عبد الناصر: ياخذ بعضه ويروح يشوف ايه المشكلة.

حسين: كل حاجة يقدرنا يشوفوها ويبتوا فيها وسياسة عامة تتعمل فى أى وزارة تبقى تبع أو وزارة الخزانة.

عبد الناصر: لأ.. ماأظنش، تبع محافظ تبقى الحكم المحلى على طول بعدين كل جهاز فنى تبع وزارته.

صبرى: هو مجلس الادارة المقترح بيرأسه المحافظ؟

عبد الناصر: آه.

صبرى: ويبقى له مدير.

الشافعى: مدير له السلطة على كل الناس.

عبد الناصر: ويبقى المدير أكبر من مدير الجمارك.

صبرى: آه.

صوت: خفر السواحل برضه انما اللايحة..

عبد الناصر: نعمل مشروع بالشكل ده.

سرى للغاية

حسين: طب ما كان فيه زन्दو عارفه وقعد مع حمدى عاشور وقعد مع الأخ رشدى وقعد مع الشعراوى يعنى قعدوا هم.

عبد الناصر: authority زائد التخليص زائد جزاءات للمديرين، جاهز المشروع ده؟
صبرى: أيوه.

عبد الناصر: بييجى الجمعة الجاية.

ابراهيم: والله أنا سمعت اللي كان بيخلص فى يومين دلوقتى بقى يقعد شهر!

عبد الناصر: ليه؟

ابراهيم: مبيهموش قطاع عام ويقول لك..

عبد الناصر: تجهزوا مشروع وتشوفوه فى المجلس ويجيبه.

صبرى: حسب كلام مصطفى خليل بيقول: عندى طاقة أقدر لغاية ٦٥ ألف وحرام إن أنا أستثمر لا فى قطورات ولا فى العربيات كتير، هو اعترف الحقيقة لأنه قيل: إنه النقل الداخلى بالنسبة للوارى بالذات فيه عجز، وقال: أنا عندى كشف يومى بييجلى بيه عدد اللوارى اللي متحركة على الطرق مبيتناقش، لكن مفيش تنسيق وبعدين مفيش ارتباط.

الشافعى: لأ.. علشان هو أجوره عالية جدا السكة الحديد..

عبد الناصر: طب هو ما حيدفع أرضية.

صوت: تعطيل وخساير.

سرى للغاية

حسين: لا.. لا.. يعنى الناس اللي بينقلوا لنفسيهم بينقلوا بأرخص من نقل زى وزارة المواصلات سواء كان باللوارى أو بالسكة الحديد.

صبرى: فيه موضوع برضه أثير بالنسبة لموقف السعوديين ورعايانا هناك، كان فيه بعض الوزرا بيقترحوا حاجة من اتنين.. يابيتعمل قانون يحظر التصرف فى الأملاك أو التقييد، والبعض الآخر بيقترح وضع الحراسة على بعض الناس السعوديين عشان نضمن إنه الرعايا بتوعنا أو أموالنا اللي موجودة فى السعودية متروحش علينا، وكان فيه مشروع بهذا.

عبد الناصر: ما إحنا عملنا رقابة من يوم ما قطعنا العلاقات.

صبرى: طيب هو فيه رقابة طبعاً.

عبد الناصر: لا.. لا.. من يوم ما قطعنا العلاقات على أساس يعنى تقريبا فيه عملية تجميد أموال.

صبرى: هو ده بالنسبة للأموال السايه ده ماشى طبعاً ودى تعليمات للبنوك، انما بالنسبة للأملاك يعنى هو أثير إنه بيبيع ويباخذ الفلوس، وبعدين باجى أنا لينا حوالى ٧ مليون جنيه فى السعودية فالخوف إنه يجى بيبيع الحاجات دى لمصر وبعدين آجى أنا أدور على أى حاجة! لو عمل هو أى حاجة يعنى مش الأملاك بتاعته بالنسبة للفلوس السايه طبعاً سهلة، هو كان وزير العدل بنفسه حتى ادى تعليمات الشهر العقارى إن أى حاجة تيجى له يوقفها وفيه كشف بالحاجات دى.

عبد الناصر: إحنا عندنا ٧ مليون جنيه؟ أنا متصور فيه مغالاة فى تقدير أموالنا الموجودة فى السعودية لأن احنا معندناش لا عقارات ولا عندنا حاجة.

صبرى: والله ياريس هو فيه ٧٠٠٠ واحد.

عبد الناصر: لا.. هم محتاجين مرتبات وهم كانوا بيترجوا الناس إنهم يقعدوا.

سرى للغاية

صبرى: آه.

عبد الناصر: لأ.. ٧ مليون! يعنى نحسب فلوسنا هو حاسب ودائعه فى البنك وإنهم مستلفين من البنك كذا، بس دى فلوسهم يعنى تبقى الحسبة دى غلط. وبعدين بعت لى يوم لما طلبت أملاك السعوديين جزء كبير كان طلال، وبعدين بعد كده اللي بييجى بعد طلال فيصل.

الشافعى: فيصل الكبير؟

صبرى: اللي هو رئيس الوزارة.

عبد الناصر: وبعدين هو عنده الأرض مموتها واخذ سلفيه عليها..

صبرى: ١٠٠ ألف جنيه.

عبد الناصر: حوالى ١٠٠ ألف جنيه مموتها ولا عايز بينها.

صبرى: بدون فوايد.

عبد الناصر: آه.. عملية بدون فوايد، واخذ فلوسها وبعدين بنى الأساسات وبعدين بطل فأنا قلت لحاتم: يروح ياخذها، وهو حاطط أساسات كان لـ ١٨ دور.

ابراهيم: وبعدين أى واحد بيستلف من السعوديين بيجد..

عبد الناصر: بنأجل الموضوع لكن بندى كده تعليمات نضبط العملية مضبوط.

صوت: لما شاف الشهر العقارى بيعمل قلق وبعدين..

صوت: كان عمل ايه فى الشهر العقارى؟

صوت: آه.. آه.. قبل ما يزورونا..

سرى للغاية

صبرى: هو فيه برضه بالنسبة السعوديين بقى علينا قسط ٦٠٠ ألف جنيه حن دفعه.

عبد الناصر: على طول ٦٠٠ ألف جنيه يروحوا يجيبوا بيهم سلاح يروحوا يدوهم للقباثل يضربوا ولادنا يعنى هى عملية كلها.. ده للحكومة مش للناس؟

صبرى: آه. فيه بقى موضوع بتاع اليمينيين واخدين حراسة على أموال العيلة المالكة وبعدين حراسة على بعض الأشخاص..

عبد الناصر: الحسن أظن عنده عمارة فى اسكندرية وعيلته هنا.

صبرى: هنا؟

عبد الناصر: العيله المالكة ولبعض اليمينيين.

صبرى: القانون الباقي طبعا هو بتاع اعادة تقييم الضريبة على الأطيان سند على أساس الضريبة. وبعدين كان فيه موضوع آثاره وزير الخزانة اللي هو خاص بضريبة الدفاع عن العقارات، فهو من وجهة نظره بالنسبة للعقارات هل ن فرض عليها نص ضريبة ولا؟ هو دلوقتى طبعا فيه حل من الاتنين.. يا إما بنقرر الضرايب يا إما بنعفو عن العقارات اللي بيدفعوا ضرايب عليها.

عبد الناصر: آه.. علشان يبقى فيه عدالة ولا ايه؟

صبرى: بالضبط.

الشرباصى: والله وجهة نظر بس علشان يبقى نخط تيسير على الناس.

عبد الناصر: لأ.. بس ده مش للمستأجر على المالك.

سرى للغاية

الشرياصى: ده المالك أيضا أعى، حتى اللى ساكن فى فيلته أو ساكن فى بيته وكان ينطبق عليه القانون أيضا أعى.

عبد الناصر: بعد كده زودنا اللى بيدفع.

الشرياصى: آه.

عبد الناصر: اللى أكثر من ثلاثة جنيه بيدفع.

الشرياصى: آه.. بيدفع.

عبد الناصر: طيب مين اللى حيدفع المالك؟

الشرياصى: آه.. المالك اللى حيدفع.